

MEMORIA XUSTIFICATIVA DO CONVENIO DE COOPERACIÓN EDUCATIVA ENTRE INSTITUTO DE ESTUDOS DO TERRITORIO E A UNIVERSIDADE DE VIGO PARA REALIZAR PRÁCTICAS ACADÉMICAS EXTERNAS

O Instituto de Estudos do Territorio (IET), é un organismo autónomo dos regulados na sección 2.^a do capítulo II do título III da Lei 16/2010, do 17 de decembro, de organización e funcionamento da Administración xeral e o sector público autonómico de Galicia, adscrito á Consellería de Medio Ambiente e Ordenación do Territorio, e ten por obxecto a análise, estudo e asesoramento en materia de urbanismo e ordenación do territorio.

O IET réxese pola Lei 6/2007, do 11 de maio, de medidas urxentes en materia de ordenación do territorio e do litoral de Galicia, pola Lei 16/2010, do 17 de decembro, de organización e funcionamento da Administración xeral e o sector público autonómico de Galicia, polo Decreto 244/2011, do 29 de decembro, polo que se aproban os seus estatutos, e polas demais normas aplicables ás entidades públicas instrumentais dependentes da Administración xeral da Comunidade Autónoma de Galicia.

En consonancia co seu obxecto, o IET exerce as seguintes funcións:

- a) Realizar traballos de investigación, análise, estudo e difusión sobre urbanismo e ordenación do territorio.
- b) Prestar asistencia e asesoramento aos concellos de Galicia para a elaboración do planeamento urbanístico e a xestión e execución do planeamento, a fin de implementar as políticas da paisaxe na planificación urbanística e territorial.
- c) Prestar apoio á consellaría competente en materia de urbanismo e ordenación do territorio.
- d) A recompilación e o tratamento da información do territorio galego, así como a produción cartográfica para as diferentes consellarías e organismos públicos da Comunidade Autónoma de Galicia, especialmente en materia agraria e de desenvolvemento rural.
- e) O apoio e o asesoramento á Xunta de Galicia en materia de paisaxe, e de colaboración e coordinación con outras administracións e sectores da sociedade.
- f) Delimitar as grandes áreas paisaxísticas sobre as que se desenvolverán os catálogos da paisaxe e elaborar os catálogos da paisaxe de Galicia.



g) Formar, sensibilizar e concienciar a sociedade galega na necesidade de protexer e xestionar debidamente as nosas paisaxes.

h) Avaliar o estado de conservación das paisaxes de Galicia, analizar as súas transformacións e previsible evolución e realizar estudos e propostas en materia de paisaxe.

i) Promover a colaboración e a cooperación en materia de paisaxe, sobre todo mediante asistencia científica e técnica mutua, e intercambios de experiencias con fins de formación e información.

j) O seguimento de iniciativas de investigación e difusión de coñecementos de ámbito estatal, europeo e internacional en materia de paisaxe.

k) Fomentar o intercambio de información e experiencias, así como a asistencia científica e técnica mutua en materia de paisaxes transfronteirizas.

l) Elaborar cada catro anos un informe sobre o estado da paisaxe en Galicia, que a Xunta de Galicia presentará ao Parlamento de Galicia.

A Universidade de Vigo (UVIGO) é unha institución de dereito público á que lle corresponde, no ámbito das súas competencias, o servizo público da educación superior.

A UVIGO réxese pola Lei Orgánica 6/2001, de 21 de decembro, de Universidades e polos seus estatutos, aprobados polo Decreto 7/2010, do 14 de xaneiro.

O IET xa asinou outros convenios similares con outras universidades, en concreto coa de Santiago de Compostela

Para os efectos sinalados, tense previsto formalizar coa UVIGO o instrumento convencional arriba referido por un período de vixencia de catro anos.

O convenio ten por obxecto establecer as condicións de colaboración entre o IET e a UVIGO, aos efectos de que os alumnos da UVIGO podan realizar prácticas académicas externas no IET.

A realización destas practicas non suporá ningún tipo de relación laboral entre os alumnos da UVIGO e o IET. Tampouco suporán ningún custe para o IET.

O instrumento convencional que se pretende asinar fundaméntase na necesaria cooperación entre as partes de cara a unha adecuada programación, desenvolvemento e verificación de prácticas tuteladas dunha parte do alumnado da UVIGO, nas dependencias do Instituto de Estudos do Territorio.



A través destas prácticas, o alumnado poderá desenvolver tarefas que lle permitan aplicar e complementar os coñecementos adquiridos na súa formación académica, favorecendo a adquisición de competencias que lle preparen para o exercicio de actividades profesionais, faciliten a súa empregabilidade e fomenten a súa capacidade de emprendemento.

O principio de concorrencia queda garantido xa que esta Universidade pertence ao Sistema Universitario de Galicia e a colaboración con esta Universidade non exclúe a colaboración e apoio debidos por parte do Instituto de Estudos do Territorio co resto das universidades galegas, en aras de acadar a máxima calidade e eficacia na prestación do servizo público de ensino superior Universitario de Galicia.

Todo isto en consonancia co previsto no artigo 10 do Decreto 244/2011, do 29 de decembro, polo que se aproban os estatutos do organismo autónomo Instituto de Estudos do Territorio, que establece que é función do Instituto de Estudos do Territorio, entre outras, a promoción, deseño, execución e seguimento de programas ou accións e actividades formativas de concienciación para a sustentabilidade dirixidas ao conxunto da sociedade de Galicia e nas súas institucións, públicas e privadas, en especial, mediante a educación e formación nas materias de urbanismo, ordenación do territorio e paisaxe.

Polo exposto, estímase xustificada a utilización do instrumento do convenio para articular as actuacións de referencia, quedando o devandito convenio fora do ámbito de aplicación do Texto Refundido da Lei de contratos do sector público, aprobado por Real Decreto Legislativo 3/2011, do 14 de novembro, con independencia de que, de acordo co previsto no artigo 4.2 da devandita norma, lle sexan de aplicación os principios desta Lei para resolver as dúbidas e lagoas que puidesen presentarse.

Para a tramitación deste convenio, tense observado o cumprimento dos requisitos establecidos na Lei 40/2015, do 1 de outubro, de réxime xurídico do sector público.

Santiago de Compostela, 16 de novembro de 2016

A directora do Instituto de Estudos do Territorio

Inés Santé Riveira

galicia

